

# La sessiun en Rumantschia– in confess a la quadrilinguitad

■ (anr/ld) En 103 dis cumenza a Flem la sessiun d'atun da las chombras federalas. Per l'prima giada sa raduna il parlament svizzer en il chantun Grischun e fa reverenza a la lingua e cultura rumantscha. Ier han ils responsabels da la confederaziun e dal chantun infurmà las medias davart las preparativas.

Claude Janiak, il president dal cussegl naziunal, ha l'emprim exprimì sia cumpassiun e ses sentiment da solidaritad cun la populaziun da Flem pertutgada d'in grev incendi. Janiak ha alura punctuà la muntada speziala da la scuntrada a Flem sco exempel vivand da la quadrilinguitad da la Svizra. L'annunzia dal chantun Grischun per ina sessiun en la Surselva cun il lieu da realisaziun haja persvas il parlament. A Flem vegnì purschì a las chombras federalas, a las medias ed als visitaders ina sort da campus enturn il «Parkhotel Waldhaus», cun in'infrastructura che ademplescha excellentamain tut ils giavischs.

## Vast program da lavur

Il program da la sessiun d'atun n'è anc betg decidì en detagl. Igl è dentant cler che la lavur politica stat en il center da la sessiun d'ordaifer. Tenor il stadi da planisaziun actual èn tranter auter previsas las suandantas fatschentas: La

realisaziun da la lescha davart il CO<sub>2</sub>, la legislaziun executiva NGF e la revisiun da la lescha federala davart l'agid a victimas. Planisada è era la debatta davart la lescha da linguas. L'assemblea federala vegn a nominar in successur per il president da la dregira federala *Giusep Nay* che va en pensiun.

Actualmain progredeschan las preparaziuns organisatoricas – en stretga collavuraziun cun il chantun Grischun e cun las persunas participadas – tenor plan. La direcziun generala dal project vegn manada d'ina giunta sut il presidi dal president dal cussegl naziunal Claude Janiak. Da vart dal parlament è in'organisaziun dal substitut dal secretariat general, *Hans Peter Gerschwiler*, incumbensda da preparar l'infrastructura necessaria. Planisads èn 80 plazs da lavur per il parlament, 80 plazs per ils schurnalists da la pressa ed il plazs per la SRG SSR. In «center da visita» stad a disposiziun da la populaziun per tuttas infurmaziuns. Ins quinta en quest connex cun var 5000 pernottaziuns per Flem e conturn.

## Il Grischun sa legra

Il president da la regenza, *Claudio Lardi*, ha sincerà ch'il Grischun triling sa legria da pudair

beneventar il parlament federal en ses territori rumantsch. Il chantun Grischun e ses partenaris impundan circa 1,5 milliuns francs per la realisaziun. Mintgamai in mez milliun tutga al chantun ed a las vischnancas da la sessiun Flem Laax Falera. Var 350 000 francs surpiglian las regiuns e sponsurs. 150 000 francs van a donn e cust da la confederaziun.

## Contact cun la populaziun

Dasper il temp da sessiun regular vegn ad esser temp avunda per survegnir ina invista en ils problems e giavischs da la regiun Surselva e dal chantun Grischun. In accent spezial furma segiramain la dumonda davart la lingua e cultura rumantscha. Igl è er in giavisch da tgirar contacts cun la populaziun en il rom da la sessiun d'ordaifer e da pussibilitar a Flem ad uschè bleras persunas sco pussaivel ina visita da la sessiun en in ambient in pau different. *Claudio Riesen*, il chancelier chantunal, ha preschentà il progrm da rama dal chantun cun ina visita dals tunnels da Flem e la Porta Alpina, ina excursiun cun la Viafier retica en l'Engiadina, in di da sport per las parlamentarias ed ils parlamentaris e la festa da finiziun la davosa gievgia da la sessiun sper il lai.



Claude Janiak e Claudio Lardi han orientà las medias a Berna davart las preparativas per la sessiun d'atun che ha lieu quest onn a Flem.